

# Unnödig Woorden

VAN WILMA LÜKEN UT LEER



WILMA  
LÜKEN

**A**nfang van 't Jahr is dat Unwoord van dat Jahr 2020 bekenntgeven worden. Un nich blot een Woord, nee ... glik twee hebben se dit Maal utköört. Wat seggt uns dat? Gifft dat in de düütske Spraak van Jahr to Jahr mehr unnödig Woorden, dat se nu al twee Utdrücken kören mutten? Dat eerste Woord Rückführungspatenschaften meent, dat Staaten, de kien Flüchtlinge upnehmen, daarför sorgen sölen, dat de Minsken, de bi uns nich blieven düren, weer torügg in hör Heimat brocht worden. Un wat dat denn kösten deit, sölen de Paten övernehmen. Daarbi meent dat Woord Patenschaft je egentlik Hülpe un Bistand, süke good um en kümmern un hum helpen. Dat tweede Woord, wat se köört hebben, heet Corona-Diktatur. Dat word van de Lüü in uns Land bruukt, de nich daarmit invertahn sünd, wat uns Regeren dörsetten mutt, um de Corona-Pandemie to minnerseren. Daardör word dat Woord Diktatur missbruukt, nettakkrat van de, de dat luudhals up hör Demonstrationen bölden, de se in uns Demokratie ofhollen düren. De Minsken, de in en würrlek Diktatur leven mutten, för de is dat so nich mögelk un meestieds ok bannig gefahrelk.

Disse Demonstanten hier nömen süke Dwassdenker. Vööl verscheden Lüü kumen up hör Demos binanner. Daar sünd enige daartüsken, de an Kum-

plotten glöven. Se menen, Corona gifft dat gaar nich, of de Krankheit is ok nich leper as 'n ördentlik Gripp. Anner Mitlopers sünd ehrder an d' rechte Kant van de politiske Landskuppe to finnen. Un denn sünd daar noch de, de kien Ofstand hollen un kien Masken

dragen wölen. Bit dat hör dat sülvst raken deit. Denn ännern se seker hör Menen. Man wenn 'n enig van disse Lüü tohören deit, kann 'n blot denken, de sünd nich richtig unner de Mütz. Un Dwarsdenken is ja egentlik blot mögelk, wenn 'n sien Bregen to 't Denken brucken deit. Bi dat Woord Dwarsdenken geiht alltied mien Koppkino löss ... Dat Denken kann doch blot dwars dör de Kopp gahn, wenn daartüsken nix in d' Weg is.

Wenn 'n upstünds Narichten höört, gifft dat al weer neje Kandidaten för unnödig Woorden. Donald Trump sien Gefolgslüü worden in de leste Tied Schattenarmee nöömt. Daarmit sünd wall de Mallbregens meent, de up dat Kapitol in Washington losgahn sünd. Up de Biller van de Dag sücht dat ok haast so ut, as wenn en Oorlog utbroken is. Man ok hier bi uns gifft dat sükse Dööskoppen, daar bruukt 'n nich eerst over dat groot Water to kieken. Ok word in de leste Tied in d' Feernsehn faken Trumpismus seggt – fröher hebben wi van Halvmallen proot, man dat langt je nich. Trump will doch overall de Grootardigste wesen: De Mallste van de Halvmallen!